

厦
門
文
獻
丛
刊

方輿互考

(下冊)

〔明〕卢若腾 撰

陈红秋 校注

厦门市图书馆 编

厦门大学出版社

西厝故居

厦門文獻叢刊


方輿互考 (下冊)

[明] 卢若騰 撰

陈红秋 校注

厦門市图书馆 编

厦門大學出版社



多面山

汉中府城西南二十里汉山，四方八面。

严州府淳安县东北三十八里蕉山，山分八面，水流十派。

金华府东阳县东五十余里嵬山，六面。

绍兴府萧山县南六十里峡山，八面皆向江。

温州府平阳县西南八十里玉苍山，亦名八面山。

赣州府上远县^[1]西南十五里欣山，十二面。

信丰县西一百二十里犹山，九十九面。

石城县北一百里牙梳山，三十六面。

重庆府城南一百二十里瀛山，崖壁峭拔，四十八面。宋刘望之诗：“山盘四十八面险，云暗三百六旬秋。”

夔州府新宁县东二十里八面山，山形八方。

泸州城西南四十里方山，八面。

兴化府城南二十里壶公山，八面。城东南三十里五侯山，正视之，为峰者五，故名“五侯”。自郡城视之，则峰三，乃呼“笔架”；侧而视之，则峰二，又呼“双髻”。

泉州府同安县西六十里文圃山，四望圆秀，名“十八面山”。

漳州府城西南十里，圆山十二面。

建宁府建阳县东南二十里庵山，十二面，形势各殊，高耸千仞。

崇安县南三十里武夷山，宋刘斧记云：“东望如楼台，南视如城壁，西顾如庾廩，北观如车盖。”

汀州府武平县东三十五里梁山，一名梁野山，高五千余仞，十二面。

邵武府泰宁县西南七十里金饶山，亦名大历山，亦名大弋山。周四百余里，八十四面。

云南府昆阳州西十里珊蒙果山，顶秀三峰，奇分八面。

[1] 赣州府上远县，当为赣州府安远县。

广顶山

太原府代州五台县东北一百四十里五台山，中台高四十里，顶平广周六里；东台高三十八里，顶平广周三里；西台高三十五里，顶平广周二里；南台高三十七里，顶平广周二里；北台高三十八里，顶平广周三里。按：今北台即古中台，中台即古南台，大黄尖即北台，栲栳山是西台，漫天石是东台。惟北台、中台，古今有异；东、西二台，古今无异。

青州府莒州沂水县西北一百九十里太弁山，顶平八九十里，俗讹作“大平山”。

河南府陕州阌乡县西北，有皇天原。其上平博方里余，三面壁立，高千许仞。汉世祭天于其上，故名之为“皇天原”。武帝思戾太子，筑思子台于其上。

巩昌府成县西北一百里仇池山，四面斗绝，上有平地，方二十余里，羊肠盘道三十六回。

宁波府奉化县北二十里汉城山，其顶平旷，可容数千人，无荆棘、丛木，居然堡垒之形。

南昌府奉新县西北五十里药王山，盘险而升至顶处，平阔二十里。

黄州府黄安县北一百里天台山，其顶广夷，可容千家，以牛耳崖为北门，梯之乃远。元末有黄杨者据之，因立寨曰“黄杨寨”。

福宁州治后龙首山，其顶平夷千丈。唐季巢寇南侵，屯兵于此，号“黄巢坪”。

临安府蒙自县东九十里羨哀山，绝顶平广千顷。

武定府禄劝州废石旧县西北三十里匿歪山，其巅凹而坦，可容数万家。

闻声山

真定府阜平县东南四十里水帘洞，成化五年九月，洞中有金鼓声，震动二十余里，至次年二月乃止。

庐州府舒城县南二十五里响山，过其下者，辄闻山中有声如钟鼓。

六安州西南二百四十里帽顶山下，有仙人洞。世传陈希夷初修真于此，闻洞有儿啼、鸡喔声，心厌之，乃移去华山。今庵基、石臼俱存。

宁国府泾县南四十里浮龟山，每风雨之夕，谷中隐隐有钟鼓声。

徽州府黟县南十六里墨岭，有灵鼓潜发，令长候鸣以卜吉凶。

徐州萧县东南三里泉水山之阴，有雪洞，深丈余。相传有人夜入山，闻洞中讲诵之声。晓往探之，但见行坐踪迹。

济南府长清县东南八十里鸡鸣山上，有一台危耸，夜常闻有鸡声，故名。

开封府郑州荥阳县治西灵源山，产灵芝、石髓，往往闻长啸声。

怀庆府济源县西八十里王屋山，每岁诸元会日，五更之初，辄闻仙钟自远洞中发声，悠扬清婉可听。

河南府登封县北十里嵩山上，有玉女台。汉武帝见三仙玉女，因名。五代秦再思《洛中纪异》^[1]云：嵩山之上，有玉女捣帛石，莹彻光洁，人莫能测。山下之人，立秋前一日中夜，常闻杵声响焉。

永宁县西四十五里天坛山，一名坛屋山，中岩有仙猫洞。相传

燕真人丹成，鸡犬俱升仙，猫独不去。人就洞呼“仙哥”，则或有应者。

西安府富平县北通关乡，入谷二十余里，有东女学、西女学二洞。东洞崖壁悬绝，洞门在崖面，攀跻不及，往往夜闻读书之声。

汉中府城南一百九十里仙台山，亦名玉女山。道家以为仙人玉女所居，山下时闻钟磬之声。

刘敬叔《异苑》云：凉州西有沙山，俗云昔有覆师于此者，积尸数万，从是有大风吹沙覆其上，遂成山阜，因名沙山。时闻有鼓角声。按：即沙州城南七里之鸣沙山也，一名沙南山。

严州府遂安县西六十里龙耳山，山神号“太姥夫人”。若地方寇发，则神鼓先鸣以示兆。

衢州府龙游县南三里鸡鸣山，每五鼓闻山中鸡鸣声，风雨不渝。

台州府城东一百五十里海中，有崛门山。山腹有一孔，上达于顶，有声则风起水涌，且有兵。吴将亡，孔内有声，远闻十里。

天台县北五十里石桥山方广寺，闻出林钟磬、梵呗声。

黄岩县西南二十里鸣山，每祈祷，辄闻飘风骤雨声。

温州府乐清县东九十里雁荡山西谷，有童子诵经岩，状如童子，常闻诵经之声。又东外谷山腰石洞，天阴则闻有鸡犬声。

平阳县西南一百里南雁荡山，五代时，僧顾齐杖锡寻访，至明王峰顶，闻雁声，而平原曲径，自然天成，喜曰：“此山水尽处，龙雁所居，而又屡闻钟梵声，岂非西域书所谓‘雁荡龙湫’者耶？”因结茅其间。

南昌府靖安县西北四十里葛仙山巅，有金钟，每遇风雨晦冥则有声。

宁州城西五里鸡鸣峰，青岚峭绝，上无人迹，时闻啞喔之声。

九江府德安县西北四十五里石鼓山，每天阴辄闻鼓声。或曰有龙潜，或曰悬泉泻激。

吉安府龙泉县东南十五里葛仙岩，旧传仙翁炼丹之地。山空月霁，时闻捣药声。

永新县东南二十里义山下梅田洞，有前后二洞。近时或过前洞，闻讽咏声，在洞中而不可见，聚听者至百十人。既而有一人忽自石空中投坠，问之，则某某也，恍惚言曰：“我适遇一女子，引至殿上谒紫衣者，为左右槟叱而下。”众异之以归，病卧数日死。

武昌府蒲圻县东北七里行将山，有洞，外宽。相传黄巢乱时，数十人入洞，石坠塞门不出，阴晦或闻钲鼓声。

通城县西南二十五里鸡笼山，夜静常闻鼓声。

岳州府澧州慈利县南二十里雷公洞，每天阴晦，则其中隐隐有声如雷。一云雷公洞在安乡县南。

南岳衡山石廪峰下，有石室，中常闻讽诵声。

长沙府安化县东南六十里雷鸣洞，时隐隐闻雷声。

茶陵州南三十里有秦人三洞，上洞有石门，不可入，但时闻有钟磬声。

重庆府南川县东南一百里有柜崖，石壁上有洞，门中有一柜，往来人闻斧斤声，有飞屑随掷下。疑洞中有神物也。

夔州府梁山县东五十里峡石市之北，有书院，峡每风雨晦冥，如闻读书声。

泸州合江县北神臂山下，有读书岩，人过之，往往闻书声。唐神童先汪七岁至其地曰：“吾读书故处也。”遂寝处其中，为九经注。

东川军民府^[2]治西五十里纳雄山，夜静时辄闻人声，以为神也。岁五谷熟，必于此告成焉。

福州府城北十五里升山，陈天嘉中，岩石间闻钟鼓声，因建灵岩寺。

闽清县西接永福县界，有大帽山。旧传其巅有鼓声，或月一二鸣，或经年一鸣。

兴化府仙游县东北四十里棋盘濠，有石修广数尺，四面如削成，旁复有石，其状如人。或以采药至，往往闻敲棋声。又湖光台下有药炉、丹鼎、棋枰。乡人早祷于溪南，闻隐隐有棋声，即雨。

泉州府惠安县东南四十七里嘶山，相传五季时，其山忽嘶声闻十余里。

漳州府长泰县东北五十里鼓鸣山，风雨晦冥，常闻鼓声。

延平府尤溪县东北八十里彭坑岩，有巨石叠其巔。或云有物凭之，夜发火光，间出虚响，如鼓角声。

福宁州宁德县西五十里罗汉洞，秋夜常闻钟声。又县北九十里支提山化成林，夜静往往闻钟鼓梵呗声。

广州府城北十里马鞍山，汉伏波将军马援尝驻兵山冈，每风雨晦冥，听之若有军声殷然。

广州府城东北二十里菖蒲涧，一名甘溪涧。旁有滴水岩，岩上悬钟，人迹不至，时铿铿有声。

东莞县东南六十里庐山上，有湖。每甲戌〔戌〕日，辄闻鼓角声。

惠州府龙川县东北一百里霍山仙游峰后，有捣药石，常闻杵声而不可见。

潮州府揭阳县有苏姑山，尝有逸人陟其巔，风露凄凄，冷气袭人之时，闻隐隐有吟咏声。或以为姑仙现神云。

肇庆府四会县西南十里广止山，一名真山，时闻钟磬之声。

琼州府万州陵水县东五十里声山，入山者，闻有声如人言。

临安府纳楼茶甸长官司^[3]东北五十里，有仙人洞，樵者经之，恒闻其中有声如鼎鸡犬。

永昌府永平县东北五里关索寨下，有洞，首尾相通。樵牧过之，常闻洞中有戈戟声。

贵阳府城东四里铜鼓山，高百余仞，山半空洞，常有铜鼓之声。

平越府黄平州北二十里有径亨洞，间有闻洞内杵声者，或时见米糠浮水而出。

石阡府城西有两山，高下相并，曰“崖门”。崖门西上有洞，春夏人过其下，闻其中有锣鼓声。又张家寨高山上，有一洞亦然。

永宁州西北八十里红崖山畔，有洞，深广数十丈。居民时闻洞中有铜鼓声。

威青卫^[4]城南二十里，有铜鼓山，山半有洞，每阴雨则其中锵然有声。

附 录

宋敏求《春明退朝录》^[5]云：欧阳少师言为河北都转运使，冬月按部至沧、景间，于野亭。夜半闻车旗兵马之声，几达旦不绝。问宿彼处人，云：“此海神移徙，五七年间一有之。”少师，即文忠公也。

风阳府泗州天长县北一里，有大湖。昔有二驴斗其中，须臾云雾四合，平地波涛因忽不见。至今阴晦，辄闻水上有鸡犬、机织之声。

平阳府汾西县东十五里有轰轰洞，洞中有穴，望前嘘而出声，望后吸而入声。其声如雷，故名。

延平府顺昌县南，与沙县接界处，有李将军濠，昔李将军提兵陷于此。至今遇风雨晦冥，辄闻金鼓之声。

高州府化州衙署庭左有石，微露出地上，谓之“龙首”。州治后有石潜江中，谓之“龙尾”。每夜静，龙首多鸣吼，声类鹅，而洪大特甚。隋开皇间，置石龙县，以此。景泰八年，石龙鸣三日夜，其夜州同知生子一清^[6]，后为名宰相。

琼州府文昌县何恭都，唐时有邓姓者为文昌尹，携家眷三十六口至此，宿于路。当夜风雨交作，举家不见。其后此地常闻锣鼓声。

梧州府容县东十里江上，有巨石如砥。昔渔人系舟夜泊其浒，

闻石上朗诵书声，因名“读书台”。

浔州府平南县西宝积寺，地下隐隐有鼓声，则贤令至。

伊州铁勒国路多沙磧，沙内闻叫唤声，不见人。或闻歌笑声，盖鬼物也。伊州，即今哈密卫，在肃州卫西北一千五百一十里。

[1]《洛中纪异》，即《洛中纪异录》，宋秦再思撰。记五代及宋初识应杂事。

[2]东川军民府，当为东川府。

[3]临安府纳楼茶甸长官司，当为临安府纳楼茶甸长官司。

[4]威青卫，当为威清卫。

[5]《春明退朝录》，宋朝宋敏求撰。书中多记唐宋典章故实，如官诰礼仪，仕宦进拟，差除制度等掌故，民情风俗，官场应酬，书画题记，诗话词评等时有著录。

[6]一清，即杨一清（1454—1530），字应宁，号邃安，昆明安宁人。十八岁中进士，历明成化、弘治、正德、嘉靖四朝，官至首辅（宰相）。

藏书山

苏州府城西一百三十里洞庭西山，有林屋洞。吴王阖闾使灵威丈人^[1]入洞，行十七日不穷，得素书三卷，持回。王以示群臣，莫识。便〔使〕人问孔子，孔子曰：“昔禹治水于牧德之山，遇神人，授以灵宝五符。后藏于洞庭之包山，君王所得，毋乃是乎？”

河南府登封县北十里嵩山下，有石室，名谩觚，内有仙书无数。昔仙人方回读书于内，玉女进以饮食。山东有蝌蚪岩，汉张芝获蝌蚪古文于此，因名。

陕州卢氏县西南五十里熊耳山，相传有金匱石室，为夏禹藏书之所。

绍兴府城东南十五里宛委山，相传禹治水毕，藏金简玉牒于此。金简玉牒，乃禹所得之衡山岫嵎峰者。按《吴越春秋》云：禹伤父功不成，乃按《黄帝中经》，见圣人所记曰：在于九疑山。东

南天柱，号曰宛委山，赤帝左〔在〕阙。其岩之巔，承以文玉，覆以磐石。其书金简，青玉为字，编以白银，皆琢其文。禹乃东巡，登衡山，血白马以祭之，仰天而啸，忽然而卧，梦见赤绣文衣男子，称玄夷苍水使者，顾谓禹曰：“欲得我山神书者，请斋于黄帝之宫，岳岩之下。”禹退，斋三月，以季之日登宛委山，发石得金简玉字之书，言治水之要。遂周行天下，使益疏记之，为《山海经》。据此，则又别有宛委矣。

余姚县治北秘图山上，有石柜，旧经云禹藏秘图之所。

温州府城北一百五十里大、小若山，旁有石柜山，山上一方石，传是黄帝緘玉版金券之秘者。

武功山跨吉安、袁州二郡，山上有葛仙坛，坛北雷崖凡数十洞，即葛仙翁藏书处。

赣州府兴国县北一百七十里覆笥山顶，有小石笥，藏玉牒，记名山福地及得道人姓名，云是王孝子所留书。有涓子者，至山发石笥，得书十二卷，故名其山曰“覆笥”。

荆州府夷陵州有黄金藏，旧有宝轴秘函藏岩窔中。宋绍兴间，陈膺访故老，谓其书皆金版，出遗书之一，得之以归，乃古《易传》。但曰易无周字，经与今之卦爻辞略同，传与今之彖象绝异。

长阳县西三十里下鱼山，有藏书洞。宋郭雍，河内人，流寓本县，藏书于此。乾道间，赐号“冲晦处士”。

辰州府城西北五十里小西山，一名鸟速山。石穴中旧有藏书千卷。相传秦人隐此，或云即穆又〔天〕子藏书处。

辰溪县龟山下，有藏书室，一名钟鼓洞。石穴深广如室。相传秦人畏坑焚之祸，携上古典籍入山。正统中，有樵者见石函中书，走报县官。既至，取其书，皆随风灰灭矣。

南岳衡山云居峰寺中，有唐太宗御书梵字经五千卷。

长沙府茶陵川〔州〕三十都有哀书石，石高数仞，若笋。上有石函，相传函中有书藏焉。

重庆府长寿县古书山，有大历初石刻，云昔人砌山路，见石穴中藏蝌蚪书数轴，“古书”之名起于此。

泸州合江县东五里安乐山，有石柜，为古人藏经之所。又有经书峡，世传蜀有《黄泽书》，在扬子云之前藏于名山。其峡峭削，人迹不到。

肇庆府阳春县北八十里硐石山，宋咸平初，赐御书藏石室。

柳州府融县东五里灵岩上，有白石巍然如列仙。宋太宗颁御书百二十轴，藏于洞中，改石[名]“真仙岩”。

庆远府城南六里南山中，有龙隐洞，藏宋真宗手迹六十轴。

[1] 灵威丈人，传说中仙人名，通称龙威丈人，隐居太湖包山。

占年山

凤阳府宿州北三十里打鼓山，旧传山中有声如鼓鸣，岁则大熟。

庐州府六安州英山县东五十里英山巅，有一井深绝，云气所萃。望之罕见，见之，其年必丰。

西安府耀州东十里鉴山，每遇年丰则光照人。试之多验，州名“耀”者，本此。

绍兴府城东南十五里射的山，远望山壁，有白点若射侯，里人常以山色明暗占米贵贱。谚云：“射的白，斛米百；射的玄，斛米千。”宁国府南陵县西南三十里射的山亦然。

广信府永丰县西北二十五里永丰山，生石乳，赤则岁歉，白则年丰。

抚州府崇仁县西南一百二十里金鸡岩，相传浮丘公养鸡之所。鸡皆金色，现则岁稔。

吉安府泰和县东三十里江滨，有减饭岭，形如侧月，每江水泛

则山圯一层。俗传此山日减，则民食日足。

衡州府衡山县西北三十里石廩峰，形如仓廩，有二户一开一阖。《湘中记》云：“开则岁俭，闭则岁丰。”

郴州东南六十里五盖山有五峰，望之如盖。乡人每岁以雪占年，谚云：“五盖雪，普米贱如土；雪若不均，米贵如银。”

平茶洞长官司城西二十里白岁山，高耸插天，土人言此山白则有年，积雪为白也。

仙游县东北四十里鸡髻岩、云顶岩，岩顶正旦有紫雾，见者丰年兆也。

汀州府宁化县北瑞花岩，多生奇花异草，则岁大丰。

上杭、永定二县界有铜鼓山，相传闻铜鼓声，则岁大稔。

福宁州宁德县东北二十里隐仙岭，有石室号“鬼洞”，年丰则鬼啸。

南宁府隆安县东四十里逍遥山，闻有五音鼓乐之声，则年丰，否则灾旱。

临安府蒙自县东北三十里耳罗山，每有风雨雷霆自山峰中起，年必大丰。

附 录

建昌府广昌县西北七里，有米洲潭。故老相传，岁熟则洲草茂，凶则洲草枯。

邵阳府竹山县东二里，有地二顷，不生草木，惟长茅茨。清明日祭而燎之，草尽则其年丰，俗号“鬼田”。

占雨山

大名府浚县东二里大伾山东岸，有龙洞，大、小穴三。天欲雨，穴中云气蒸蒸出焉。

应天府城东八十五里云穴山，有洞，天欲雨则出云。

苏州府昆山县北三里马鞍山南，有石穴，高丈余，容十数人，恒津液。天将雨，辄有云群行从南来，映山亦出云应之，与同北，北就虞山，即大雨矣。

徽州府黟县东北十五里三姑山，一名吉阳山，有三峰，天将雨，先有鼓角之声。一云山上有磨石，赤三年则野火自焚；非期妄焚，天即雨。

庐州府六安州霍山县西三十里乌梅尖下，有雷公洞，壁上有雷公斧迹，洞口起雾，即殷殷而雨。

扬州府通州东南二十里军山，有白云洞。云兴则雨，云散则晴。

徐州萧县东南十二里明山，有穴甚深，将雨则吐云。

平阳府浮山县东南四十里鸣山，天欲雨，飒然有声。

汝州西南六十里崆峒山巅，洞穴如盎，将有大风雨，则白犬自穴出，农人常以为候，亦名其山曰“玉犬峰”。

西安府乾州武功县南九十里太白山，山半横云如瀑布，则注雨。

杭州府城西四十里独山，每出云，晴则雨，雨则晴，独异于众峰，故名。又名金鳌山。

富阳县北六里樟岩山西北一穴，雾起氤氲即雨。

于潜县北四十五里天目山，有龙穴。其大逾寸，穴外回环之状，径三寸许，若有物盘旋而成。欲雨，则先有云自穴出。

严州府寿昌县南十里天井山，天欲雨则有声如钟鼓。县东北二十里燕山，每遇亢旱，有烟雾直上，群燕翔集即雨。

衢州府尝山县^[1]北二十五里石门山，其巅有窍，每旦云出其中，东驰则雨，西则晴。

开化县西一百里古田山，每旦云一缕浮空而出，所向之方即雨。

宁波府慈溪县雨微山，本名雨征山。山上有云气即雨，邑人以

此为验。宋人避庙讳，改“征”为“微”。

象山县东八里鼓吹山，天欲阴雨，有声轰轰如鼓次〔吹〕。

南康府城西北二十里庐山康王谷之巔，有钊城，相传周康王钊尝游名山至此。天每欲雨，辄闻山上鼓角萧〔箫〕笳之声，声渐至城，而风雨晦合，村人以为常候。

抚州府崇仁县南一百里宝盖山，一名华盖山，有雷洞。天将雨，则云气如炉烟直上，须臾雷声殷殷而出。

九江府城南六十里庐山，天将雨，则有白云或冠峰岩，或亘中岭，俗谓之“山带”。不出三日必雨。

袁州府萍乡县东六十里玉女峰，天将雨则有五色云气，俗谓之“玉女披衣”。

武昌府兴国州通山县西二十里白羊山，东晋永昌中，有三人乘白羊入此，山故名。至今每有白羊见于山上，则云雨兴。

黄州府蕲州东北一百五十里鼓角山，天欲雨，先闻鼓角声，亦名“鼓吹山”。

襄阳府宜城县西三十里石梁山，起白云则雨，黄云则风，黑云则蛮多病。

谷城县西南六十里薤山，一名剪山。诸山云起，此山无云，终不雨，土人以为验。

德安府孝感县东北八十里雨山，两山相峙，中有洞。云出大峰则雨，小峰则风，土人以为占候。

衡州府衡山县治后，吐雾峰与巾紫峰相连，云气升腾，虽晴亦雨，雾开即晴，邑人以为候。

辰州府沅州黔阳县东南一百六十里罗公山，有鸛鸛鸣即雨至。

郴州兴宁县东南六十里浦溪山，一名瑶冈岭。其顶常有云气覆之，三朝无云必雨，冬雪透顶则晴。

重庆府南川县东六十里九递山，绝壁如银。邑人视其昏明以候，晴雨不爽。

叙州府长宁县治西笔架山，观其显晦，可验阴晴。

福州府福清县西南二十五里灵石山上，有报雨峰，久旱欲雨，其峰必震撼有声。

泉州府城西南六十里灵源山，南一支为乞雨山，山顶有七星墩，乡人于此祷雨，掘得炭者即雨，不者雨末期也。

永春县东白马山，旧传有仙人乘白马升岩，早见则雨，人号“白马仙”。

建宁府崇安县南三十里武夷山六曲，有三层峰，每早曛欲雨则先出阴霾，欲霁则开豁，远近视之以为候。

福宁州城南四十里红山，一名小葛洪山，上有大、小风门，天欲雨则吐雾。

福安县东南一百一十里白气岩，常有白气冒其顶，邑人望之以卜阴晴。

宁德县西五十里石室洞，岁旱，或闻洞中有音乐声，必雨，岁乃丰稔。

肇庆府城东三十里高峡，一名高要峡。旧传山有灵羊，每出鸣，风雨随至，又名灵羊峡。

肇庆府城南隔江十里铜鼓山，久晴山色冥迷则雨，久雨山色鲜露则晴。

四会县西六十里石涧山，有泉自窦中出，旱则流水声闻数里，雨便寂然。

阳春县西南一百三十里丫髻山，一名白水山。上有天池，飞泉一道，晴响则雨，雨响则晴。

梧州府郁林州北流县东北十五里勾漏山，有玉虚洞，每云从洞出则雨，风从洞入则霁。

[1] 衢州府尝山县，当为衢州府常山县。

占灾祥山

宁夏中卫城西南警山，遇警急，此山辄鸣。

台州府城东盖竹山腹有一孔，上达于顶，有声则风起水涌，且有兵。

赣州府龙南县西南八十里松林岩，有峰卓立，半壁悬开一窍，时平则闻鼓乐声，将乱则闻钲角声。

常德府龙阳县南六十里金牛山，金牛见则太平。

延平府城南九峰山，若发火即府官受厄，一怪事也。

惠州府和平县北九十里羊角山，时有金鼓声，金则兵起，鼓则兵息。正德初征池大鬣，嘉靖初征曾蛇子，屡有验。

浔州府贵县北七十里路旁，有登仙崖，时有声，闻宴鼓声，则岁穰人安；闻战鼓声，则民疫兵起。县西北七十里马岭山，一名龙马山，又名马度山。俗传闻马嘶及奔蹏声，则人多疫病。

南宁府上思州板门村，距州治五十里，有汪盟潭。时或变故，则鼓乐鸣于岩间。

占科山

池州府城西魁山，相传山有宝光，夜见，乡必有登第者，故名。

杭州府余杭县有金鹅山，鸣则出贵人。

南安府上犹县东巽山，邑人有登科者，山下石嶂必生光彩。

永州府道州宁远县丹桂乡，有龙岩。相传若闻岩有龙吟之声，则其乡有登贤书者。

保宁府巴州学南金榜山上，有奇石名印斗，又名书案，山腰光射，文庙辄有科第。